

VICIÑOS E ECOLOXISTAS EXIXEN O SANEAMENTO INTEGRAL DO RIO

SALVEMOS O TEA

O pasado domingo 4 de setembro celebrouse en Ponteareas unha concorrida manifestación, convocada pola Asociación para a Defensa da Natureza do Condado (ADENCO), baixo o lema de "Salvemos o Tea". Durante a mesma puideron escoitarse consignas como "Basúreiro do Foxaco, atentado contra o Tea", "Rio limpo, fonte de riqueza", "Salvemos o Tea, sexa como sexa" ou "O rio do Condado, está contaminado".

Apoiaron este acto reivindicativo numerosas entidades, entre as que cabe salientar a AGENG, as asociacións de viciños de varias parroquias (Alxén, Fornelos da Ribeira, Guillade, Moreira, Pesqueiras...), os clubs de piragüismo de Mondariz e Salvaterra e diversas forzas políticas, entre as que non figuraba, como era de agardar, o PP, partido que goberna a práctica totalidade dos concellos bañados polas augas do rio Tea.

Os convocantes leron un comunicado no que sinalaron ao Concello de Ponteareas e á Xunta de Galiza como máximos responsables de que un dos ríos máis limpos, até hai pouco, de toda Galiza estexa convertido na actualidade nunha cloaca, nome-

adamente no seu curso medio-baixo. Denunciaron, ademais, a existencia de até cinco proxectos de minicentrales para o curso alto do rio.

As talas indiscriminadas, as edificacións nas franxas inmediatas ao rio, os vertidos industriais e de augas residuais-fecais sen depurar, a contaminación en diversas praias (As Partidas), a extracción ilegal de area, os aterramentos e recheos sen licéncia, etc. son algúns dos graves problemas do rio Tea denunciados por ADENCO.

Fronte a este estado de cousas, os ecoloxistas e as entidades cidadás que os apoian esixen o saneamento integral do rio, a demolición ou reforma dalgúns presas, a protección das ribeiras, maior vixiáncia para evitar recheos, extraccións e vertidos incontrolados, a denegación dos proxectos de minicentrales e o acondicionamento de lugares para o disfrute do rio. ADENCO, logo de resaltar a numerosa participación no acto, declarou que ten pensado continuar coas mobilizacións. ❖

Emílio Insua

SEGUNDA CAMPAÑA COASTWATCH EN GALICIA

CoastWatch iniciouse o ano 1987 en Dublín; na actualidade son 21 os países europeos que participan no Proxecto. No Estado Español constituíronse os primeiros grupos na Comunidade de Valencia no ano 1990; Galicia, xunto coa Rexión Murciana, incorporouse o ano pasado e así son xa todas as Comunidades que están involucradas.

A actividade dos grupos participantes no Proxecto consiste na inspección, a finais de Outubro, dun tramo de 5Km de costa (Bloque) subdividida en 10 unidades. O estado ambiental de cada Unidade recóllese en forma de respostas ás cuestións dunha enquisa homologada, única, para todos os países (Poden engadirse, como complemento, outras preguntas: é o que se vai facer en Galicia na Campaña 94). Os datos recollidos son enviados á equipa coordinadora de COASTWATCH-Galicia para o seu tratamento informático e posterior redacción dun Informe anual sobre a costa galega; este informe é enviado á Coordinadora Estatal para o Informe da Costa do Estado Español -acaba de ser publicado o correspondente ó ano 1993. Cos informes dos 21 países participantes elabórase un documento que reflicte o estado ambiental das costas de Europa.

Na campaña do 93, en Galicia participaron 1740 persoas, organizadas arredor de 13 Centros de EXB, 17 Institutos, 3 grupos universitarios, 7 Colectivos ecoloxistas e 13 grupos de amigos. Cubríronse un total de 477 enquisas, a maioría na provincia de Pontevedra, que recollen a inspección de aproximadamente un 25% do litoral (a maioría das Comunidades do Estado mostrean o 100%).

Para a campaña do 94 espérase incrementar a participación, particularmente nas provincias de A Coruña e Lugo. Os interesados e interesadas poden dirixirse a Pilar Antelo (981-564736), José Antonio Martínez (982-580949), Fernando Lahuerta (986-365726), Carmela García (986-230558) ou Tano Mato (986-812335). ❖